

NDEE NÁ NI RROP CART NI BCUAÁ SAN PABLĪ LO DE BNIETY TESALÓNICA NI RELDILAAZ JESUCRIST

1 ¹ Nare PablĪ, cun Silvan ne Timoteo, cacuaan cartré par laat ni reldilaazti Jesucrist láani guidx Tesalónica, laat ni nát xpiny Xtadni Dios ne Dad Jesucrist. ² Xtadni Dios ne Dad Jesucrist gunldeeny quiat ne iguaadny laat guelnalediulaaz.

³ Llillite rdeedni gracy Dios pur laat de saniroldilaazni Jesucrist, te pur ziy riáld idxanni pur ni dxi pur dxi amazru reldilaazti Jesucrist, ne cad tubyti amazruza rcaazti de saa bnietti. ⁴ Ax quesentiand rzaclaazni rniin pur laat nez lo iraru de xpiny Dios. Rdxaipnideb xa ná paciency ne guelreldilaaz xtenti, ax ruelaazti irate ni runné bniety laat ne de guelzii ni cadeedti. ⁵ Ziy ríeny dec xnezquipacni ná guelgurtisy xte Dios te pur, pur guelzii ni cadeedti, laany siáldny laat yiuut lo guelrnabee xtenny.

⁶ Ne zec ni xnezpacni run Dios irate, ax ziyza steedny guelzii de ni cateed laat guelzii. ⁷ Chiy laat ni cadeedti guelzii anre, sniidxny laat guelrzilaaz cun dumni dxi ni idiacá Xtadni Jesucrist llayabaa glay guelrcuabcháa xtenny ni ná zecpacza bal, cun de ángli xtenny ni quesentiand nap guelrnabee. ⁸ Chiy gúnny castigu de bniety ni quit rumbee Dios, de bniety ni quit rcuadiag diidx chaldilaaz de didxzaac xte Xtadni Jesucrist. ⁹ Siáldny laadeb castigu ni ná par chazy, zit suguaadeb par Dios ne par lo guelrnabee nasaa xtenny. ¹⁰ Ziy gac dxi ni gueed Xtadni Jesucrist par ito de xpinny laany, ne sdxalo iratedeb laany, laadeb ni reldilaazdebny. Ax né laatiy pur ni agüeldilaazti xtiidxny ni bdxuenén laat.

¹¹ Pur ningui quit rdeedti rnaabni lo Dios pur laat dec gacnény laat ibányti zec ni riáld, zec ni guridxny laat ibányti. Ne rnaabzacni lony dec cun guelrnabee xtenny gacnény laat chalee gac cumplir irate de xgabzaac xtenti, ne irateru de ni runti pur ni reldilaaztiny. ¹² Ax ziy xquel izubyaat Xtadni Jesucrist, chiy laany izubyaany laat pur guelrcaaz xtenny ne xte Xtadni Dios.

2 ¹ Anre de saniroldilaazni Jesucrist, xte ni gueed Xtadni Jesucrist stuby ne xte ni idxasaan cun laany, rguiin rnaabni lot ² quit isaanti dec senciy isacan de biny laat, laadeb ni rniideb abdziny dxi ni gueed Dad Jesucrist. Quit idxibti guindiagti de ni rniiziy, o de ni rniiziy dec tuby spírít raipy laadeb ziy, o dec dunzacni bcuaan cart lodeb ziy. ³ Quit isaanti tu gún engany laat, te pur anste ni idziny dxiqui, nidootellga gueed de dxi ni aquitru icuadiagti bniety xtiidx Dios. Chiy idiacá tuby bniety ni gún púrzi ni rdxalaaz bindxab, bniety ni a ná par infierni. ⁴ Lagac laab subyaab laab ne sdxichnéb irate ni rumbee de bniety zec Dios, ne irate ni illiú par ito bniety Dios, axt sbep laniudoo xte Dios ax sniib dec laab náb Dios.

⁵ Gulchanelaaaz dec ziy guniia laat chi guzuguanía laat. ⁶ Ne anre laat anánti tú casu par quitga gac ziy, sino que axtisy chi idziny dxi ni ná par gac ziy. ⁷ Acayac de xgab ni quit illiúqui lo guichliu, per nuu ni casu quit gac ziy. Chi agubicá ni casuqui, ⁸ chiyru aidiacá biny malqui. Ne Dad Jesucrist cun tubyla ilduibny quinxúny laab, chiy cun guelrcuabcháa xte ni gueedny initlony laab. ⁹ Biny malqui pur bindxab gueedbi, ax quesentiand guroo guelrnabee gapbi. Zunbi de cos ni idxalo bniety, ne zunzacbi de milagri par gúnbi engany. ¹⁰ Cun iralote de mal cugueubi de ni canit lo Dios, pur ni quit rcaazdeb ne quit rziguelddeb chaldilaazdeb de didxldí ni zelee ílda laadeb. ¹¹ Pur ningui isaan Dios yalotec sacandeb, ax chaldilaazdeb ni ná dixú. ¹² Te par iratedeb yálddeb castigu, laadeb ni quit nialdilaazdeb ni ná didxldí pur ni mazru bdxalaazdeb baandeb de mal.

¹³ Per dumni quit cuezti ideedni gracy Dios pur laat, de sáan ni quesentiand rcaaz Xtadni Jesucrist. Te pur desde gulo abcuabee Dios laat ldát lo castigu pur ni ananiat pur Spíritu Sant, ne pur ni agüeldilaazti ni ná didxldí. ¹⁴ Par ziy guridx Dios laat gacti xpínny chi bdxuenén laat de didxzaac xte Xtadni Jesucrist, te par yáldti llayabaa rut rbezny.

¹⁵ Pur ningui de saniroldilaazni Jesucrist, gulsutip ne gulchanuu de ni bseedni laat chi bzuguanén laat ne de ni aguniin laat pur cart. ¹⁶ Ne lagac Dad Jesucrist cun Xtadni Dios ni rcaaz dumni, ni rguzaclaaz dumni cun guelgucné xtenny iduibtiampite, ne ni bniidx dumni tuby güen speranz pur güen ni nány, ¹⁷ laany cuzaclaazny laat ne gacnény laat sutipti par iniit ne gúnti irate ni ná güen.

3 ¹ Anre de saniroldilaazni Jesucrist, gulnaab lo Dios pur dumni te par yiub iriich xtiidx Xtadni Jesucrist iranetzte, ne izubyaadeb xtiidxny zec ni guc cun laat. ² Ziyza gulnaab lo Dios par íldany dumni lo de biny mal, lo de biny ni quit nabány xnezni, te pur gati irati bniety reldilaaz xtiidx Jesucrist. ³ Per Xtadni Dios rzuubpacny xtiidxny, ne laany gacnény laat sutipti ne igualony laat lo irate de mal. ⁴ Dumni rdxapni confianz Xtadni Dios dec laat cayunti ne zelaa gúnti ni aguniin laat. ⁵ Xtadni Jesucrist gacnény laat chaza chanuut guelrcaaz xte Dios, ne gacnény laat quit chaxaclaazti zec ni quit güexaclaazti Crist.

⁶ Anre de saniroldilaazni Jesucrist, pur laany rnabeen laat: Gulbicá lo tutix de sáan ni candzá quit rcaaz gún dziiny, ne quit nabánybi zec ni abseedni laat. ⁷ Te pur laat anánti xa riáld ibányti par ibányti zec ni nabánni. Dumni quit bzuguanétin laat sin quit nidxanni dziiny, ⁸ nicliza quit tu bniidxti ni bquiinni sin quit nidillyni. Laat nánti dec quesentiand bdxanni pur bdxanni dziiny, rdxni ne guxin bdxanni dziiny par quit niguun xtsiinti niacnént dumni niacni guelnabány. ⁹ Gati pur quit rdxapni nez ninabeen laat niacnént dumni, sino que par bliuun laat xa ibányti ax gúnti zec ni rdxanni. ¹⁰ Chi bzuguanén laat axt guniin laat: Ni quit rcaaz

gún dziiny, quitza iquiintib. ¹¹ Per anre abindiagni dec nuu de saat ni candzá quit rcaaz gún dziiny, ax riutédeb rut quit riálddeb. ¹² Par de bnietqui dunní rniin ne rnabeendeb pur guelrnabee xte Xtadni Jesucrist dec cuedxideb, gúndeb dziiny par gacdeb guelnabány.

¹³ De saniroldilaazni Jesucrist, quit chaxaclaazti gúnti ni ná güen.

¹⁴ Belati nuu tubyti ni quit rcuadiag diidx gúnbi ni caniin lo cartré, gulguiaa tú bnietqui ax quit ichaatitbi te itiulob. ¹⁵ Per quit gaptitbi zec tuby cos ni rdxichnét, sino que gul lidxbi zec tuby betsti.

¹⁶ Xtadni Dios ni rguaad guelnaldiulaaz, laany iguaadny laat guelnaldiulaaz llillite ne par irate. Xtadni Jesucrist suguanény iratecti.

¹⁷ Nare Pabli, naapaca cacuáa de letriré par caguaapadios laat. Zeec runa cun irate de xcarta, zeec ná de letri xtena. ¹⁸ Xtadni Jesucrist, laany gunldeeny quia iratecti. Amén.